

Ես տոեցի նրան իմ դանակը: Նա աշխատում էր բաժանել երկու միմեանց կպցրած թերթեր: «Այդպես կարելի է փչացնել, պետք է մի հեղանիություն վրձնել սոսիսնձը», խօսում էր ինքն իրան: Դանակը մի կողմ դրեց, վեր կացավ իր խուրջինի մեջ մի բան որոնելու:

Թե ի՞նչ ժամանակ վերադարձել էր Ասլանը կաթողիկոսի մօտից, կամ մինչեւ գիշերոայ ո՞ր ժամը Չալլադը զբաղուած էր իր մագաղաթներով, ես տեսնել չկարողացայ, որովհետեւ անգործութիւնից քունս տարաւ եւ աչքերս բաց արի այն ժամանակ միայն, երբ առաւօտեան արեգակի ճառագայթները ներս էին շողացել մեր խուցի նեղ լուսամուտներից: Անապատում լինել եւ այնպես հանգիստ քնել, դա աներեւակայելի բան է: Գիշերը որքա՛ն տանջեցին մեզ Կտուց անապատում: Բայց այստեղ ոչ ոք չբախեց մեր դուռը, ոչ ոք չարթնացրեց մեզ, ժամ հրաւիրելով, թեւ այստեղ եւս միաբանները սովորութիւն ունեին գիշերային ժամերգութիւններ կատարելու:

Ասլանը սովորականից աւելի ուրախ էր. ուրախ էր եւ Չալլադը: Նրանք շտապեցրին ինձ շուտով հաւաքել մեր իրեղէնները, որ ճանապարհ ընկնէինք: Կղզու ափում սպասում էր մեզ վանքի նաւակը: Մենք նախ գնացինք կաթողիկոսի մօտ, նրա աջը համբուրեցինք եւ առինք նրա օրհնութիւնը: Բարի ծերունին արտասուքը աչքերում ճանապարհ դրեց մեզ, որպէս մի գթառատ հայր, որ ուղարկում է իր որդիներին դէպի հեռու աշխարհներ, մարգարիտներ որոնելու: Մի քանի արեղաներ բերեցին մեզ մինչեւ կղզու ափը: Մեծ շնորհակալութեամբ բաժանուեցանք մենք այդ առաքինի կրօնաւորներից, որոնք այնքան անմոռանալի յիշատակներ թողեցին իմ մեջ... Սօտաւորապէս մէկ ժամից յետոյ նաւակը մեզ հանեց ցամաքը: Այստեղ, «դրսի տան» մեջ, պահուած էին մեր ձիաները: Նստեցինք եւ շարունակեցինք մեր ճանապարհը...

Ի. ԿԱՆՔԵՐԻ ՇՈՒՐՁ

Երեկոյեան մենք անցնում էինք Կապուտ-կող կոչուած լեռան կապտագոյն ձորերի միջով: Այդ լեռան պատմական անունը, մեր հին գրիչներից հետզհետէ աղաւաղուելով, կոչուեցաւ Ընծաքիարս, որ Ընծակայ-քար բառի փոփոխութիւնն է: Մինչեւ այսօր այդ լեռան կողքին կպած է Ընծակ անունով գիւղը, որ հայկազանց նահապետներից մէկի, Ընծակի անունն է կրում: Նոյն նահապետի անունով եւ լեռը կոչուեցաւ Ընծակայ-քար: Քար բառը մեր հին լեզուում երբեմն սար կամ լեռ բառերի տեղ էր գործածուում: